

Mai le faatonu vala’aulia, Sir John Kirwin

E ia te a’u le āva ma le agaga gae’etia i lo’u vala’auina e avea ma faatonu vala’aulia o le New Zealand Herald mo le asō. Ina ua ou taliaina le vala’au, na amata ai ona ‘ou malamalama i le tāua ma le telē o le matāfaioi tau’ave e aofia i le faatautaia o lenei nusipepa lauiloa ma āloa’ia. Peita’i, e va’ava’alua ma le mitamitaga i le tofiga mo lenei galuega le manatu, ‘e faapefea ona ou faatinoina lenei galuega, e leai so’u tomai e faatino ai!’ E fou nei mea ia te a’u, ma o le naunauta’iga ina ia fetau ma tala feagai se galuega ou te faia. Ona o a’u o le faatonu vala’aulia muamua o le Herald, ou te lē mana’o e sasi se mea.

I le filifiliga o ni mataupu e faaofi mai i lo’u tulaga o le faatonu vala’aulia, na ou manatu i ni mea e sili ona tāua ia te a’u, ma ou te faamoemoe fo’i e tāua ia te outou, atoa ai ma ni mataupu o loo a’afia ai lo tatou taulaga ma le atunu’u. E sili ona ou mitamita i lo tatou taulaga lenei, ma ou te mana’o e faailoa atu le tulaga lenā. Mai le fai faato’aga i mātū, i le tagata o loo aumau i le gataifale ma matāfaga i sisifo, poo le lotolotoi o le pisi i le taulaga, e ‘ese’ese ala o le soifuaga ae tatou te fuifui faatasi o tatou uma o tagatanu’u o Aukilani. E tele ina ou faaigoaina Aukilani o tagata Pasefika ona ou te va’ai i Aukilani o motu Pasefika ua palu faatasi i se tānoa. Ua malosi fo’i le itū i Asia, i tagata mai Saina, Korea ma Iapani, ma o se tasi lea o sini o le opogi o vaega ia ma faaliliu nisi o tala i gagana a tagata fai mai ua aumau i lo tatou taulaga. O le lōmia o tala i lau lava gagana, e faailoa atu ai matou te amana’iaina ‘oe. Matou te iloa o loo e aumau iinei, ma o le faaliliuina o tala i aso ta’itasi o se lu’itau, ae o se meaalofa faapitoa lea mo ‘oe.

O o’u faanaunauga mo Aukilani, o loo tapu’eina i le itulau tomua o le Herald o le asō mai le alii tusitala alualu i luma o Allan Wrath. O loo tapu’e uma ai vaega mo’omia o le taulaga o Aukilani ma faaaliga faapitoa e faia i vaega ta’itasi o le tausaga. Ou te mana’o ina ia teu lelei mo ‘oe le itulau lea ma faapipi’i i le puipui o lou potu. O mata’itusi o le Jafa, ua faasefulufia tausaga o felaua’i e faasino i tagatanu’u o Aukilani, ma ina ua ou toe fo’i mai i le tausaga na te’a nei, na ou mana’o e suia le faalautelega o ia mata’itusi i le ‘just another fantastic Aucklander’ ona o se taulaga sili ona manaia ma ou te manatu e ao i tagatanu’u o Niu Sila ma Aukilani ona

mitamita ai. O tagata i Amerika e sili ona mitamita i taulaga e afua mai ai, ma ou te manatu e tatau fo'i ona faapena ona tatou mitamita i lo tatou taulaga ma tatou fiafia. O le to'atele o tagatanu'u i Aukilani, masalo e lē o taliaina le manuia o le aumau i le taulaga lenei, ae 'ana se'i malaga 'ese mo se vaitaimi e pei o a'u, ona faato'a latou iloa ai lea o le mātalasi o le taulaga nei.

E iai ni tala ua ou komisiina faapitoa e faatatau i mataupu o loo tāua ma ou fia malamalama atili iai, mai le lipoti a le palemia, e o'o i le fuafuaga faavae o le lumana'i o Aukilani, aiga i ta'aloga, atoa ai ma tapenaga a le Auckland Blues mo le taamilosaga o le tausaga fou. Ou te mana'o fo'i ina ia faailoa le mataupu i gasegase o le mafaufau ma faaogā le nusipepa e tautua ai le manuia lautele.

E tele taimi e mana'omia ai se tagata ta'alo lakapi e 'aia le faalogologo tigā, ma o lea ua 'ou tofia ai nisi o le 'au tusitala a le Herald, ina ia 'aia ne'i faalogologo tigā ae galulue i le tusia o tala i mataupu e le masani ai. O le a ou tālia ma le faamoemoe maualuga le lipoti a la'u uō o Wynne Gray i mataupu i 'upu fai politiki, o se suiga mai ana tala tusia masani i lakapi. O loo iai ia te a'u sina lagona o le popole ma le masalosalo pe o le a faapefea ona tino mai lenei galuega, ae poo le a sau silasila iai, ae o se tulaga o le faagae'etia. Ua ou taumafai ina ia famautonu ma ia iai sina suiga la'ititi, ma e maualuga lava lo'u faamoemoe o le a e fiafia iai.

Manuia,
JK